



Armin e Flurin Caduff, bab e feagl, cuagl Ensemble concertont.



Surdada dil schec tras Armin Caduff a sur Giosch Albecht per siu institut da logoterapia. Dasperas il menader actual da quella instituziun Stefan Schwarz.

FOTOS G. CAPAUL

## 30 onns La Compagnia Rossini

Concert giubilar sco revista da spir success

■ (anr/gc) Pli che plena era la vasta sala dil Titthof a Cuera, venderdis sera, d'in publicum che spetgava cun ardur sin La Compagnia Rossini e siu concert da giubileum pils 30 onns. Il program fetg pulpiu empermetteva ovras reputadas e zun appreziasas dils capocumponists casa. Atgnamein eisi stau ina revista da success cun pil pli parts digl immens repertuar, s'arcunava durant decennis e che ha era fatg ord La Compagnia Rossini ina ambassadura autentica dil grond potenzial musical en Surselva. Il concert ha la formaziun giubilara mess sut il motto «Momenti festivi». Daveras, ins ha dau ina cumprova ton da cumpetenza e qualitat da La Compagnia Rossini cun solists, solistas, pianist, instrumentalists, cantaduras e cantadurs spir plascher, ideal e tschaffen.

Il meriteivel e nunstunclenteivel

fundatur, il spiritus rector ed in summa l'olma da La Compagnia Rossini, Armin Caduff, e sustenius enorm era da sia consorta Lisabet, ha beneventau cun engraziar ed en legria veseivla, annunziand ch'ins vegni a porscher in matg dad enconuschentas e bialas melodias al publicum aschi numerus. E ch'ins sappi gest aunc cumbinar igl emperment concert giubilar cun ina donaziun da beneficenza fetschi l'entira cassa aunc pli legrevla. Dil reminent vegn quei concert pil giubileum da La Compagnia Rossini aunc daus en siat divers loghens e pliras cuntradas dalla Svizra – aschia era a Puntraschigna en Engiadina (ils 21 da quest) ed il final ei a Falera en la Fermata cuort avon Nadal. Ei ha regiu durant igl entir concert tempra festiva plein deletg e spetga tier in publicum engrazieivel ed entusiasmau. La Com-

pagnia Rossini ei fetg populara e gauda tradiziunalmein gronda simpatia e bia attaschadadad.

### In program ton tschaffont sco imponent

Prest duas uras e mesa – cun ina pintga pausa denteren – ha il concert giubilar da La Compagnia Rossini cunzau. Ed ins ha dumignau da smarvegl e suveranamein quella megaprestaziun. L'emprema part ha cumpigliau ovras dils cumponists Mozart, Beethoven, Donizetti, Bellini e secapescha era da Rossini. Ils solists: Armin Caduff, Flurin e Maria Catrina Caduff, duas generaziuns da famiglia, sco era Cornelia Cathomen ed Anica Defuns ed igl ensemble dils solistAs, cul chor entir, han fascinau e persquadiu trasatras. Grond sustegn han els retschert dil virtuos pianist Eric Christen e dils meisters-

instrumentalists dil Swiss Brass Consort, che coopeerescha dapi onns cun La Compagnia Rossini. Ella secunda part dil concert – suenter pausa – han ils medems executurs ed execturas interpretau sin ault nivel ovras da Verdi, Smetana, Dvorák, Flotow, ina enconuschenta polonesa da Chopin per ils 200 onns suenter sia naschientscha ed ina cumposiziun da Gastaldon.

Per quei che La Compagnia Rossini ha adina tgirau il cant en nies lungatg, resuna la canzun romontscha «Stai si defendada» sin in arranschament dalla renomada «A Tgalavaina». Encorunau il concert ha ins – sco ei s'auda era – cun «La Rossiniana» – renomadas melodias da quei cumponist talian che ha la fin finala dau alla giubilara ton il num sco il program ed ei daventaus siu segn da marca per propi.

### Concludiu cun in bi gèst

A fin ei il megaconcert ius cun in gèst da generusadad surprudenta. Il schef da La Compagnia Rossini, Armin Caduff, surdat a sur Giosch Albecht il recav da quei concert cun in schec da buca meins che 10 000 francs en favur digl Institut da logoterapia ed analisa existenziala a Cuera. Quella instituziun ei vegnida fundada da sur Giosch Albecht avon 15 onns e menada dad el tochen avon entgin temps. El e siu successur ella direcziun, Stefan Schwarz, han retschert la considerabla donaziun e saviu bien grau persuerter, essend che quei institut privat survegni negin sustegn dil maun public. La valenta prestaziun musicala da La Compagnia Rossini ei aschia seligida cun exemplarica generusadad demussada. Tgei bi finale per in'occurranza giubilara che quei ei stau.

## Igls indigens canoschan la veia

Cursa da stadals a Sur

■ (anr/pd) Dumengia passada ò l'Uniu da giuventetna da Sur-Mulegns-Marmorera anvido alla cursa da stadal tradiziunala a Sur. Alla partenza eran 14 participantas e participants.

Gio onns organischa l'Uniu da giuventetna dallas treis vischnancas da Surgôt: Sur, Mulegns e Marmorera ena cursa da stadal. Ena cursa tradiziunala cun participaziun per gronda part dallas treis vischnancas. Igl onn passo vevan anc fatg part 30 participantas e participants e chest onn è igl domber crudo sen 14 e da chels, oter tgi igl ma-

tador da Salouf, Marcello Brunett eran tots participants/as dallas treis vischnancas.

### Relaziuns idealas

Ena bela scusalada da Flex a Sur. Ora scu or digl codesch, bung frestg ed en vial spert. I sa mossa veaple tgi l'occurranza è ena maestranza tranter igls indigens. Igl migler taimp digl de ò gia Stefan Moser da Sur. Igl vial da Flex a Sur ò ena lungezza da manevel 3 km ed ena differenza d'otezza tranter la partenza e l'arrivada a Tga Crest da 370 m. Gl'è nia classificgia

e partia aint an dus categorias: 1. Unfans 1992 e pi giovens, 2. annadas 1991 e pi vigls.

### Rangaziun :

(annadas 1992 e pi giovens)  
1. Manuel Cotti, 03.09.49; 2. Francesca Spinass, 03.18.89; 3. Tom Spinass, 03.22.84; 4. Curdin Odermatt, 03.36.84; 5. Lindard Cotti, 03.53.45

(annadas 1991 e pi vigls)

1. Stefan Moser, 03.02.92; 2. Marcello Brunett, 03.10.89; 3. Victoria Spinass, 03.11.17; 4. Catarina Morscher, 03.14.21; 5. Katia Cotti, 03.17.57; 6. Margret Jäger, 03.34.58; 7. Valeria Moser, 03.39.67; 8. Pirmin Cotti, 03.41.21; 9. Claudia Odermatt, 03.43.30



(Davos da sanester) Stefan Moser, Marcello Brunett, Manuel Cotti, Victoria Spinass; (davant da sanester) Tom Spinass, Francesca Spinass. PDS

## STUSSAVGIA

### Gie ad in runal niev cun energia solara

(anr/sr) Cun in clar gie (62 da 70 vuschs) ha la societad cooperativa «runal Tenna» decidiu la sonda sera da star davos il project d'in runal niev cun energia solara. Tenor Felicia Montalta, ch'ei incumbensada da Turissem Svizzer ed Agid da muntogna da promover il turissem en Stussavgia, duei il runal gia vegnir en funcziun la sesiun d'unviern 2010/2011. Cugl agid da sponsurs e partenaris vegli

ins construir a Tenna igl emperment runal cun energia solara ch'ei dat sil mund. Usas sto la societad procurar las lubientschas necessarias per ch'il project persister, ecologic ed innovativ sappi vegnir realisau. Plinavon maunchien aunc rondund 400 000 francs per la finanziaziun dil runal. La sonda ei vegniu lantschau in'acziun ufficala per rimnar daners pil project.

### Nominaziun dalla pcd dil Plaun per las elecziuns circuitalas 2010

■ (cp) La pcd dil Plaun ha nominau ella radunonza da commembers dils 10 da mars a Domat ils candidats per las elecziuns circuitalas dil 2010. Per l'elecziun el cussegl grond pil cumin da Razén han ils 53 presents nominau Elita Florin-Caluori (Panaduz, vedra), Cornelia Märchy (Domat, tochen uss suppleanta), Elmar Foffa (Domat, tochen uss suppleant), Theo Joos (Domat, tochen uss suppleant) e Remo Cavegn (Panaduz, niev).

Sco suppleantAs candideschau Anita Decurtins (Domat, vedra), Adolf Caluori (Panaduz, veder), Sonya Bardill (Domat, niev), Diego Farrer (Domat, niev), Philipp Ruckstuhl (Domat, niev) e Robert Berni (Panaduz, niev). Sco mistral vegn Pierino Casutt (Domat) proponius per la reelec-

ziun, Albert Sutter sco vicemistral. – Per l'emprema gada ha la partida nominau ina candidatura el cumin da Trin. Cun Martin Mathiuet stat in candidat cumpetent sco deputau el cussegl grond a disposiziun. Martin Mathiuet ei collaboratur dalla Lia Rumantscha, menader da projects el sectur da formaziun e menader da scola. El dispona d'ina vasta experientscha e cumpetenza en damondas da formaziun e cultura ed ei ina representanza ideala pil cumin da Trin el cussegl grond.

Plinavon ha la radunonza dalla pcd dil Plaun eligiu la suprastanza per ils proxims quater onns. Sper Theo Joos sco president fan Remo Cavegn, Sonya Bardill, Guido Cathomen e niev Martin Mathiuet part dalla suprastanza.